



CONSEQUENZAS DA LA REVISIUN PARZIALA DA LA LESCHA DA TAGLIA DA L'AVUST 2009

Cun sia **incumbensa da fracziun** ha la PS pretendì ch'il chantun preschentia las consequenzas finanzialas da la revisiun da la lescha da taglia 2010 fin 2013 per il Grischun e per las 10 vischnancas las pli grondas (PCG 2013/14, p. 848). Il cussegl grond ha acceptà l'incumbensa en il senn da las explicaziuns en scrit (PCG 2014/15 p. 117 e 158). Las calculaziuns cumpiglian ils onns fiscals 2010 fin 2012 ed ils puncts da revisiun menziunads qua sutvart:

- ▶ Augment da las deducziuns per uffants e da la deducziun per ils custs da la tgira d'uffants
- ▶ Midada da la taglia sin la facultad (tariffa da taglia ed imports libers da taglia)
- ▶ Reducziun da la tariffa da la taglia sin il gudogn da progressivamain 7 % a proporzionalmain 5,5 %

Las perditas da la **taglia sin las entradas** ston vegnir structuradas – tenor l'incumbensa – tenor las entradas bruttas da passa 300 000, da passa 150 000, da passa 80 000 e da fin 80 000 francs; decisiv per l'attribuziun a las categorias d'entradas è l'onn fiscal 2010. La distgargia sto vegnir mussada en la gruppas sco totalitad e per pajataglia tenor l'import ed en la procentuala da la prestaziun fiscala, uschia che en la gruppas la pli bassa pon vegnir resguardads mo ils pajataglias cun ina prestaziun fiscala. Autramain vegnissan falsifitgadas las valurs medias. Las deducziuns per uffants ed ils custs da la tgira d'uffants pon vegnir evaluads mo cuminaivlamain, perquai che mo uschia po vegnir resguardà l'effect da progressiun da las deducziuns pli autas. Perquai che tar la taglia sin las entradas èn sa midads mo las deducziuns per uffants ed ils custs da la tgira d'uffants, vegn fatga in'evaluaziun supplementara che sa referescha a pajataglias cun ina deducziun per uffants. Tras quai poi vegnir mussà pli cleramain quant autas che las distgargias concretas da las famiglias pertutgadas èn.

Per la **taglia sin la facultad** mancan prescripziuns correspudentas en l'incumbensa e calculaziuns da las categorias d'entradas na mainan betg a resultats ch'èn materialmain corrects. Sco tar la taglia sin las entradas ston vegnir furmadas gruppas er tar la taglia sin la facultad. Ma qua èsi da partir da la facultad suttamessa a la taglia. Las suandantas categorias vegnan furmadas: facultad suttamessa a la taglia da passa 50 milliuns, da passa 10 milliuns, da passa 1 milliun, da passa 500 000, da passa 200 000 e da fin 200 000 francs. Per l'evaluaziun ston vegnir exclus ils pajataglias che n'han avant e suenter la revisiun betg ina facultad suttamessa a la taglia. Autramain vegnissan falsifitgadas las valurs medias.

Per las consequenzas da la **reducziun da la taglia sin il gudogn** na vegnan betg pretendidas differenziaziuns tenor l'autezza dal gudogn en l'incumbensa. L'evaluaziun pretendida er per las vischnancas na po betg vegnir furnida, perquai che las instabilitads dal gudogn da singulas interpresas falsifitgassan fermamain in'evaluaziun sin plaun communal e perquai che en singulas vischnancas fissi pussaivel da trair conclusiuns davart singulas persunas giuridicas, quai che na va betg a prà cun il secret fiscal. Er las consequenzas da la reducziun da la taglia sin il gudogn vegnan mussadas tenor stgalims da gudogn.